



綏寇紀畧補遺中

虞淵沉

下

上焦勞天下十有七年恭儉似孝宗英果類世廟白晳
豐下瞻矚非常音吐如鐘處分機速讀書日盈寸手筆
逼似歐陽率更有文武材善騎嘗西苑試馬從駕者莫
能及講射觀德殿挽三石弓發輒命中暇則用黃繩穿
墜石而手自繫之曰吾以習勞也行郊廟之禮先宮中
散齋致敬而後出就齋宮旣蒞事視容端手容莊拜移
晷刻而後起欠伸跛躄無自而入焉居深宮之中不苟

嘖笑教太子諸王準諸禮法左右長御不以私怒而小
過威刑無珠玉玩弄之娛無聲色歌舞之奉無臺池鳥
獸之樂暇時鼓雅琴命中書爲譜以進曰此足以娛心
神勝它樂也舊事散金銀豆於地令宮人爭取之以爲
笑上弗獲已命取棗栗代之宮中有月宴有時宴外戚
公主家以歲時進甘果皆傳旨停免自初年罷三吳織
局尚方御澣濯之衣履襪則以布爲之緣曰朕方率天
下以去奢返朴且令諸子知艱難可弗自身始乎覽百
司章奏指授方畧鉤考條流洞悉機宜抉摘疵病上書

者爲之流汗色恐退而皆服手書口詔告誡者數百言
無不援据詳洽文切指明嘗夜半捧黃封下閣門大臣
披衣起讀中使曰上未寢也在卽位之初鄉儒術遵先
王與士大夫型仁講義以比隆於三代未幾禍亂大作
巧僞滋生不得已用權宜行綜覈以察奸濟變諫者不
察至以之受譴呵然上嘗拊髀嘆曰此非平世法也欲
以待方垂無警將寬租薄罰以偕黎元於休息而災荒
兵火迭至而不已羣臣又乘其危急以多方誤之於是
上下猜防中外燭亂心志憤懣法令紛更天下事浸至

於不可爲矣晚年痛念山陵籓邸重以五皇子之薨至
於感損微信禳祥小數幾幸禳災塞異請真人張應寧
設醮光明殿禱祀鬼神田貴人亡後獨坐忽忽自失曾
下詔選擇妃嬪意乃慘淒無聊尋亦中止見者竊怪上
英資銳氣何以中道漸衰卽至尊亦不知其若此也嘗
冬至祀太廟烈風起於殿角燎火盡滅不成禮而罷上
太惡之還宮頓足太息曰朕不自意將爲亡國之主嗟
乎尚何言哉尚何言哉十七年二月賊信日徧上手自
爲詔以罪己曰朕嗣守洪緒以來深念上帝降陟之威

祖宗付托之重宵旦兢惕罔敢怠荒蠢茲流寇本吾赤
子忘累世之豢養肆廿載之兇殘赦之益驕撫之益叛
坐令秦豫邱墟江楚腥穢貽耻祖宗負我黔黎罪非朕
躬誰任其責所以使民輸芻輓粟居送行賫加賦爲無
成邱者朕之過也使民輸芻輓粟居送行賫加賦爲無
藝之求預征有稱貸之苦者朕之過也使民室如懸磬
田里蕪萊望煙火而無門號冷風而絕命者朕之過也
使民日月告凶旱潦游至師旅所處疾病爲殃上千天
地之和下叢室家之怨者朕之過也至於任大臣而不

法用小臣而不廉言官首鼠而議不清武將驕懦而功
不舉皆朕撫御乖方至誠未格中夜以思跼踖無地已
實不德人則何尤用告爾天下官吏軍民人等朕痛加
創艾深省愆忘匪涉虛文確循實事要在惜人材以培
元氣守舊制以息紛囂行不忍之政以收人心蠲額外
之科以養民力各省直撫按急飭所屬有司拊循窮困
安插流移在耗羨其弗加無淫刑之或逞其草澤豪杰
之士有能恢城自効績比開疆卽陷沒脅從之流苟或
率衆來歸名高返正若殲渠魁以獻馘卽疏世爵以侯

封朕不食言誓諸皞日於戲忠君愛國人有同心雪耻
除兇誰無公憤尚懷祖宗之厚澤助成底定之大勲思
克厥愆咸孚朕志於時逆賊已盡收降將爲之用且詐
其民以誑誤之山東河北往往殺其令以應賊中外惴
恐皆以唐西川靈武爲言顧難於發端恐上不聽先以
身受其禍左春坊李明睿前以召對時專疏請上親征
以成祖出漠北世宗幸承天上宜先幸山東卽藩邸以
駐蹕而鳳陽固中都可以爲行在麾召齊豫之師二路
夾進則西征可以破賊此中興良策也都憲李邦華明

睿之鄉人也邦華意在南遷恐朝論不合欲以太子居南中爲之漸明睿曰吾前疏請親征爲南遷也太子稟命則不威專命則不敬庸若上親行之爲便乎邦華參以己意繕疏進曰我國家並建兩京原以供時巡備居守皇上卽不南遷宜令太子諸王居舊都一繫天下之望臣南人也必有言臣以遷自便者臣願隨皇上執管鑰而分遣信臣良將扞收圍以南發皇太子以撫軍主器之重暫違定省號召東南共圖滅賊卽皇上赫聲濯靈益以丕振上以副二祖之成筭下以定四海之危疑

臣與有識籌之已熟惟上速圖之疏入未下尋有旨以戰守事卿貳詹翰諸臣會議於東閣明睿見衆論狐疑未有所定奮曰易云利用爲依遷國尚書盤庚皆言遷事唐以再遷而再復宋以一遷而南渡諸君何所疑而諱言遷乎朝士見其論錯愕未有應者惟少詹事項煜請以太子監軍往南中與邦華之計頗合翼日上坐平臺有怒色召閣臣前曰憲臣有密奏勸朕南遷卿等看詳來取手本授閣臣閣臣曰昨東閣會議有二臣亦主此論上曰二臣何人閣臣奏過姓名及持說本末上曰

祖宗辛苦百戰定鼎於此土若賊至而去朕平日何以責鄉紳士民之城守者何以謝先經失事諸臣之得罪者且朕一人獨去如宗廟社稷何如十二陵寢何如京師百萬生靈何逆賊雖披猖朕以天地祖宗之靈諸先生夾輔之力或者不至此如事不可知國君死社稷義之正也朕志決矣閣臣又進曰諸臣言出忠愛非有它意上曰忠愛平日所當盡心若臨急建此謀便是苟且求免閣臣曰太子監軍古來嘗有亦是萬世之計上曰朕經營天下十幾年尚不能濟哥兒們孩子家做得甚

事先生早講戰守之策此外不必再言先是上命科臣左懋第往南中察沿江舟師士馬之數津撫馮元颺嘗請以輓漕之三百艘待命於直沽口得密旨允行上意非不欲南自慚播越恐遺恨於萬世將俟舉朝固請而後許諸大臣材不足以定遷而賊鋒剽忽卽欲遣太子兩王禁軍非唐羽林神策者比萬一賊以勁騎疾追卽中道潰散其誰禦之故藻德岳貢河漕之命已行尋而中改曰不如守也時關寧棄地之議已決撤黎玉田守關以山永李希沆爲津撫趣吳帥率全軍入援京師其

近郊布置則倚督師建泰保撫標以爲重調宣大陽懷
之兵會於固關通津昌密諸鎮各提兵以備督師調遣
若稍能撐拄犄角緩時日以待關門之師至則神京尚
可圖全不幸宣大陷保撫兵變被殺建泰疾甚不能軍
而賊騎漸已逼矣上聞宣大之陷也命提督京營太監
王承恩戒嚴城守薊遼總督王永吉節制各路援兵俱
便宜行事給吏兵二部空頭五百道以便犒賞上猶示
整暇召考選官滋陽知縣黃國琦等三十三人於中左
門問以安人心勦寇生財足用計安出國琦應對稱旨

面授兵科給事中餘以次對未及半中使傳一小封上
覽之色變起入禁中諸臣猶待命久之俄傳語曰姑退
出閣門有知其事者則昌平報陷也明日日中有數騎
突西直門殺人知賊至亟閉門城堞十五萬四千有奇
京兵羸弱者四萬人其數僅當三之一并淨身男子三
四千人共守內丁擇候候便處營軍立風雨中糗糒又
不以時給城上不能具釜鬲人給百錢買糜粥饑寒竊
怨望上日召問諸臣皆惶恐莫對噓唏淚承睫書御案
十二字示司禮大監王之心尋拭去有議以百官率閭

左以乘城且出私財養兵者魏藻德曰營兵尚膽怯若百姓登城望賊而走人心益搖且奈何上遂止賊夜攻諸門城上不知受何人指西洋礮不置鉛丸以虛擊聲殷雷達旦問之不殺賊一人賊仰射矢如雨守陴者皆懼中官自以爲有勞益負氣謾罵諸文臣曰若等平時竊富貴今事急而苦吾輩用力文臣有職在分守者求登城亦格之曰爾何知不許聞者大以爲憂時浹旬陰慘十八日大風雨雷雹午刻雨止賊攻彰義門甚急監視宣大太監杜勲者先降賊射書城上呼曰我杜勲也

勲素貴中官性服屬其同類見勲獨身來不發矢相向加勞苦勲曰宣大二十萬人皆降汝等守何益我入城有所講將見上而自陳之亟繼以入與諸璫耳語者良久語不聞守者前固已解體既見耳目非是似若苻兩端者遂投兵喧呼欲下不可止賊乘之外城遽陷上聞變登萬歲山四望久之召新樂侯劉文炳駙馬鞏永固有所屬旣而各罷去易服帶佩刀奪正陽門欲出守者疑內變返砲拒擊前驅曰提督王老爺猶弗信亟告之曰大駕乃止上亦中悔欲還還至白家巷望城上懸白

燈者三原約以爲內城既破之信上知事不濟亟回宮見皇后曰大事去矣爾爲天下母宜死后慟哭曰妾事陛下十八年卒不聽一語今日同死社稷亦復何所恨上悽愴不復顧輒意氣自如御便坐呼左右進酒正色而進金卮者十數皆嚼左右慙伏仰視不敢動大聲傳趣兩宮及懿安后以自盡曰莫壞皇祖爺國體宮人復命猶以娘娘領旨爲對叩頭跪起如平時旣而曰傳主兒來主兒謂太子二王也太子二王入猶常服上曰此何時可弗改裝乎亟命持敝衣至上爲解其衣換之且

手繫其帶而告曰汝今日爲太子明日爲平人在亂離之中匿形跡藏名姓見年老者呼之以翁少者呼之以伯叔萬一得全來報父母仇無忘我今日戒也左右不覺哭失聲班始亂上起入中宮見周后已自經拔劍撞其懸而轉之知己絕乃入壽寧宮長平公主年十五方哭上曰汝何故生我家揮之以刃殊左臂又劍斫昭仁公主於昭仁殿年六歲矣時七萬中璫皆喧譁走宮人亦奔迸都市十九日質明閣部大臣猶有傳籌入朝者俄聞城已陷駕崩

懿安后縊而未絕僞將軍李岩河南人知爲后禁其下勿侵犯欲送還太

康家后仍從容自縊死○宮人費氏投井不死為賊得費詭曰我長公主也賊擁詣自成驗非真賞賊帥羅姓者費又曰我非公主實天潢也將軍貴人當冠服告眾以尚帝室女不亦榮乎羅賊喜至夕費伺其醉竊利刃刺殺之大呼曰我一宮人得斃賊一頭目足矣遂自刎死久之始知遺弓在萬歲山

之壽皇亭與王承恩對縊亭新成上所閱內操處也上御絳黃袍跣左足胸書朕失國無面目見祖宗不敢終於正寢又書寧毀我身無傷百姓等語人有傳上於丙子年啓大內鐵篋得圖一頗類聖容跣足被髮而手持一繩嗚呼豈非天哉初上之將登萬歲山也揮諸璫歸守諸門故駕崩不知鼎湖所在上與承恩下所乘騎而

登山其馬踏地齧草漸至於山後守壽亭者一璫識之

曰此上所乘也乃跡而得之云

松江諸生袁燦若丁丑進士定弟也十五年夢

至一所見歷代創業主會議革命有頃一人如帝者狀被髮伏地嗚泣愬在明高帝語之曰此事非我所能主當往問建文皇帝燦上崩後之三十三日而吳三桂請若流汗浹背而醒

本朝大兵入關大破李自成於一片石為上縞素發喪

以禮改葬謚上曰懷宗端皇帝后曰烈皇后安奉神主

於歷代帝王廟中南中羣臣議上尊謚曰毅宗烈皇帝

后曰孝節烈皇后皇太子二王謚曰獻愍太子永悼王

定哀王具在別紀上所葬卽田貴妃園寢也人號之曰

思陵有謂上末造事多與建文相類惠宗之亡有皇太后呂氏在上今亦有懿安皇后在上惠宗有三皇弟今亦有三皇子惠宗馬后殉今亦周后殉且廟號之上諡贈之加自二帝二后以及東宮諸王暨前後殉國諸忠皆駢集宏光時若一案然尤可異也

史氏日記死節者不以日月爲斷先北都以殉主也春秋傳曰君爲社稷死則死之國亾與亾臣軌之太者也次豫豫臺使者銜命博訪幸以其人傳焉先皇其知之矣故重之也自秦晉以下無錄非無錄也曰時迫矣不及乎錄也然則記死節者必以其錄乎曰有則核而詳無則存而畧有錄焉而不必核者矣君子之於前朝也

殘編齧翰且繹而出之敢謂弗核乎無錄而存焉者寡矣吾懼今日存之而後日失之其或今日失之而後日又有存之則繼而出者吾庶幾望之也北都以禮臣表忠之疏爲鵠而緒聞佐之表忠之正祀諸臣尙矣附祀武臣則盡以遇害死者附祀文臣無一二臣遇害者乎舍一二臣無遇害而不祀者乎若是者宜改曰不忍改也內臣亦可以正祀乎曰春秋之法善善長何可以闡故畧而不書舍死事北都無可書者乎春秋信以傳信疑以傳疑緣人之喜怒以爲傳著其疑太甚且俳而不經

故畧之也豫以御史蘇京優卹之疏爲鵠而緒聞佐之
自一命以上建祠致祭且加恩於其家嗚呼上于勸忠
之道備矣北都破而羣臣何可以不死則猶恨乎死之
少也御史之所列也將累數以徵於書今在錄者四十
一人盡於此乎曰闕文也其書半軼而不存以視乎秦
晉楚蜀其猶爲幸也已秦之曹少保其可風乎將軍死
綏真寧之一戰也又終之以榆林秦事武臣爲烈矣孫尙
書死渭南矣或曰邠縣之潰可乎謀人之軍師國邑敗
則死之成敗利鈍天也可弗謂之忠與夫晉京師之蔽

也於太原則書之於寧武於宣大大書矣不再書死乎
晉弗繫乎晉者尊京師也紀江北者爲國難乎曰前此
矣前此曷爲乎書曰追書也楚之於武昌也以故相則
書其官於承天也以獻陵則書其地於永州也以全三
王則書其事死同書不同也若蜀則糜爛矣何可以書
何可以書者不勝書也嗟乎北都之表忠也豫之優卹
也以蜀視之可勝嘆哉然天下之不勝書者又不獨乎
蜀也

北都

正祀文臣

東閣大學士工部尙書贈太傅范文貞公景文

字質公 吳橋人

癸丑進士投龍泉巷古井妾亦自縊

戶禮兩部尙書兼翰林院學士贈太保倪文正公元璐

字鴻寶上虞人壬戌進士遺語家人曰必大行殮方收吾屍○文正從未有以贈死節者倪公之弟請曰曾子

云得正而斃孟子云順受其正何必不諡死節者於是并劉詹事之議亦定

左都御史贈太保吏部尙書李忠文公邦華

字懋明吉水人甲辰

進士縊於文信國祠堂中

兵部侍郎贈太子少保王忠端公家彥

字遵五莆田人壬戌進士守德

勝門聞陷自投城下不死仍自縊

刑部侍郎贈尙書孟忠貞公兆祥

字肖形交河人壬戌進士守正陽門死於

門下妻劉氏亦死

左副都御史贈左都御史施忠介公邦曜

字四明餘姚人已未進士

飲藥

大理寺卿贈刑部尙書凌忠清公義渠

字茗柯烏程人乙丑進士盡焚

其生平著述絕吭死

太常寺少卿贈兵部右侍郎吳忠節公麟徵

字磊齋海鹽人壬戌

進士○麟徵初登第夢一人叉手向背吟文信國山河破碎風飄絮身世浮沉雨打萍之句問之途人云是隱

士劉宗周時尙未識宗周也當城陷時有祝孝廉淵者以奏保宗周被逮畱京師公之故人也臨命召祝至酌酒忼慨告以前夢乃絕其事甚奇

左春坊左庶子贈禮部左侍郎周文節公鳳翔字巢軒山陰人

戊辰進士碧血九原依舊主白頭二老哭忠魂公之臨死詩以遺其親者也

左春坊左諭德贈禮部右侍郎馬文忠公世奇字素修無錫人

辛未進士以司經局印授其僕焚朝衣冠於庭北向拜闕南向遙拜其母而絕

左春坊左中允贈詹事府正詹事劉文正公理順字湛六杞

縣人甲戌殿試第一名居鄉有賢名賊李岩其同邑也傳箭遣人護之聞已死乃拜哭去

翰林院檢討贈少詹事汪文烈公偉字長源休寧人戊辰進士書於壁曰

夫婦同死

節義成雙

太僕寺丞贈本寺少卿申節愍公佳允字素園永平人辛未進士投井

死

戶科都給事中贈太常卿吳忠節公甘來字和受新昌人戊辰進士

御史贈太僕少卿陳恭愍公良謨字賓日浙江鄞縣人辛未進士

御史贈太僕少卿陳恭節公純德字澹元湖廣永州人庚辰進士

御史贈大理卿王忠烈公章字芳洲武進人戊辰進士守城歿城至阜成門賊已

攀堞上賊持刀說降公大叱之賊乃築其膝遇害

吏部員外贈太僕卿許忠節公直字若魯如臯人甲戌進士

兵部郎中贈大理卿成忠毅公德

字潛民懷柔人辛未進士公先以鷄酒哭

奠梓宮賊露刃脅之不為動母與妻同死一子六歲公撲殺之然後自殺

兵部主事贈太僕少卿金忠節公鉉

字伯玉京師人戊辰進士鉉初以駕

部巡皇城每過御河輒流連不能去歸語其弟曰我一見御河若依依不忍舍何也竟投河死

大同巡撫贈兵部尙書衛忠毅公景瑗

字帶黃韓城人乙丑進士

宣府巡撫贈右都御史朱忠莊公之馮

字勉齋大興人乙丑進士初總

兵王承允誘宣人降賊會居庸總兵黑雲龍至之馮宣言京師將發兵勦宣人之應賊者已而刑牛馬與承允

盟賊至承允開門降之馮死

此二十二公者褒忠之首乎范文貞倪文正李忠文

以德以位以名則社稷臣也社稷之臣從死社稷不

綦重乎然則終之以許文學琰湯布衣瓊者何居曰

禮官有激勸之道焉倣建文龔安節儲貞義例祀之

可也正祀以從諸公之後則過矣傳曰士死義謹別

其為士而書之

進士贈河南道監察御史孟節愍公章明

字伯昭忠貞公兆祥之子

癸未進士

節愍父子同死矣乃列附祀文臣首可乎給事李清

議曰倣建文顏孝節父子合席而異食屈其禰也夫

子不先父食足矣附祀則豈合食之義乎當進之保定之張公羅彥金公毓峒邵公宗元不宜正祀乎曰祀典以君臣同殉社稷保定則月日稍後矣且南中所不及聞也故特書之

正祀武臣

太傅新樂侯贈太師恒國公劉忠壯公文炳

字淇筠其先海州人

以靖難功為和陽千戶籍任邱後遷宛平瀛國公應元之孫新樂伯劾祖之子寇急上於萬歲山騎射文炳與駙馬鞏永固日侍左右受手詔諭勲戚出家丁巡緝京師無應者及外城破上曰能為朕一巷戰乎兩臣對曰今止臣等親隨數騎耳其何以戰上曰至是耶朕志決矣不能為太祖高皇帝守社稷當為死社稷耳於是君

臣相向哭城破侯與駙馬各殺數騎見第中火起下馬投井顧其影乃戎服曰此軍容不可以見皇上地下索冠服不得得他冠而小裂之乃得冠遂投井死

惠安伯贈太師進侯張忠武公慶臻

永城人闔門自焚死長子左都督承

允從死次子承志冒難南歸

襄城伯贈太子太師進侯李貞武公國禎

襄城被執見自成不屈言

先帝宜葬以帝禮太子諸王不可殺戮自成從之

駙馬都尉贈少師鞏貞愍公永固

大興人以黃繩縛子女五人於柱闔門自

焚曰帝甥也不可辱賊

太子少保左都督贈太保劉忠果公文燿

新樂侯文炳之弟守外城

永定門外城破返至渾河收兵見內城破哭曰天乎文
耀在外城不即死以內城必能守得一見皇上請罪耳
不意如此乃署一板於井旁
日太子少保劉文耀死處

三關總兵贈太保周忠武公遇吉

三韓人城破日擐甲
運矛策馬入中堅手

刃巨賊百餘矢擐甲如
蝟毛身中數十創而死

正祀武臣當矣李襄城任京營而失守得無有遺議
乎且其死亦稍後矣雖然被執不屈死於其官祀之
可也進侯則過矣

寧遠總兵掌中軍都督府吳忠壯公襄

少傅左都督劉公繼祖

春秋大復仇然孰有身殉下宮之難子效秦庭之節
如吳寧遠者乎今追加之典隆矣此書為前朝作稱
舊官禮也繼祖瀛國公應元次子守皇城東安門聞
變馳歸大呼皇帝數聲投井死其妻某氏并二妾亦
從之嗚呼劉氏忠壯忠果祀矣此亦戚臣也何以不
及然則兩臣者皆補入正祀可也

正祀諸忠婦女

成忠毅德母贈淑人張氏

忠毅初以直節為烏程所忌
下獄淑人廷訴慷慨有丈夫

風京師陷忠毅跪母前而哭母曰吾知汝
意矣汝死吾何可不同難乎乃相繼殉

周忠武妻贈夫人劉氏劉氏縱火先焚其居跨馬彎弓率家僮巷戰從辰至未殺傷千人

人矢絕然後赴火死家僮無一人降者賊恨之屠寧武城凡殺二十餘萬人○又曰劉夫人勇過遇吉弓之強

一軍莫能挽率健婦百人上一樓賊至射殺賊數百人矢盡百婦人死者亦過半夫人舉火焚樓死遇吉有子

數歲健丁五百人夫人以其子屬之曰能衝賊出為都督全此子幸也五百人巷戰死并其子俱沒無一人降賊者

金忠節鉉母贈恭人章氏年八妾王氏

汪文烈偉妻贈恭人耿氏文烈與耿恭人飲酒題詩於壁其縊也恭人在左乃復下

日不可亂夫婦之序其從容如此

馬文忠世奇妾贈孺人朱氏 李氏

劉文正理順妻淑人萬氏 妾李氏

陳恭愍良謨妾贈孺人時氏

婦人以正命死者例以節書況國難乎成忠毅周忠

武之母若妻以下尚矣乃若新樂杜太夫人率其三

子婦從容自縊此孝純皇太后之靈而烈皇帝所以

有光國也宜為正祀第一以諸忠婦女附焉

新樂侯劉文炳母太夫人杜氏太夫人新樂伯效祖妻也三子文炳文耀文炤

事急夫人服命服登樓懸孝純皇太后像召文炳妻王夫人并李夫人吳夫人至拜哭曰太后恩深自此不得

報矣於樓上作數十縵曰大家一處死命積薪其下死即焚之謂文炳曰爾疾馳去殺一賊猶快我謂文炤曰

爾不可從死瀛國太夫人在當奉之潛匿且劉氏不可無後城破皆就縊杜六縊李九縊始絕或勸李投井曰

同樓死杜太夫人命也吾可獨異耶瀛國正以甲申三月爲八十誕期賊信甚急上猶賜金幣其後瀛國卒以壽終文炤居江南劉氏訖不絕

尙有范景文妾亾其姓成德妻亦張氏孟兆祥妻何氏章明妻王氏失載

野史載宮人魏氏費氏者費氏見前註死甚烈畱以俟攷

附祀文臣八人除孟節愍公改入正祀外

保定巡撫兵部侍郎贈尙書徐公標

兵科給事中贈太僕少卿顧公鉉

工科給事中贈太僕少卿彭公瑄

貴州道御史贈太僕少卿俞公志虞

大名副使贈右副都御史朱公庭煥字中白甲戌進士

金忠節鉉從死弟鏞

戶部郎中贈太僕卿徐公有聲

保撫死亂兵矣然其人有殉國之志焉不幸遇變先皇之所恤也祀之可也金忠節之有弟殉兄其義可風焉顧公鉉以下非遇害者乎當時閣臣如方岳貢如邱瑜皆以遇害死死之稍後故不書他官之遇害者亦此例惟顧彭俞三公得祀其有幸有不幸焉尙

有文臣應附祀而未及者應補入

寧武道王公允懋霸州人辛未進士與總兵周遇吉同死

四川道御史趙公讓昆明人被執不屈遇害

河間知府方公文燿福建人庚辰進士

大同督糧郎中朱公家仕

順天府推官劉公有瀾

通州知州張公經蜀人庚辰進士

又有順天府訓導孫順桐城人高攀桂靜海人張體道聞喜

人閔汝茂南宮人徐蘭芸永平人以上俱貢生

野史有光祿署丞于騰蛟副兵馬姚成中書宋天顯

滕之祈阮文貴經歷張應選毛維順天知事張貞達

儒士張世禧及二子懋賞懋官備攷

正祀諸生二人

長洲縣生員贈翰林院五經博士許琰字玉重望亭楊樹園人

布衣贈中書舍人湯文瓊

又有順天諸生曹肅與其弟時敬大同諸生李若葵

一家九人自縊肥鄉諸生宋湯齊郭珩 王拱宸

題曰一門完節於甲申四月倡義為張汝行所殺鷄澤諸生殷淵於甲申五月倡義遇害於廣平西之

廣羊山
應補入

附祀武臣

成國公朱公純臣

上於危急時傳硃諭至閣命成國總督內外諸軍托以東宮會閣臣已出遂置之几上純臣不知也城尋破李自成得之故純臣被殺

定遠侯鄧公文明

武定侯郭公培民

陽武侯薛公濂

永康侯徐公錫登

鎮遠侯顧公肇迹

西寧侯宋公裕德

懷寧侯孫公維藩

彰武伯楊公崇猷

宣城伯衛公時春

投井死

清平伯吳公遵周

新建伯王公先通

安鄉伯張公光燦

右都督方公履泰

係南和伯方一元之子

錦衣衛千戶李國祿

此南中附祀武臣也尙有武臣應附祀而未及者應
補入

遂安伯陳公秉衡

保定侯梁公世勳

豐城伯應襲李公開先
皆被執不屈死

大同總兵朱公三樂

昌平總兵李公守錡

都督周公鏡
係烈皇后之弟夫婦同自縊

錦衣衛僉事田宏祚
自縊 田宏謨
被殺皆戚臣宏遇之弟

援勤總兵劉永昌
隸南樞史可法標下賊急率兵勤王至揚州九龍橋文信國祠下聞變望

闕遙拜投橋下死

野史有錦衣衛官王國興李若珪高文采附載

正祀內臣

總督京營太監王公承恩諡忠愍
隨先帝自縊

附祀內臣

前司禮監太監李公鳳翔諡忠壯
城破自殺

王公之心

高公時朗

褚公憲章

方公正化

張公國元

保定死事諸臣

京師陷後賊黨偽制將軍劉芳亮以三月二十四日

攻陷保定闔郡死之

光祿寺少卿張公羅彥

大書官爵姓名於廳事之壁驅妻妾幼女及子婦於井而後自

經有三犬守之不去噬一跌足賊絕其拇賊大駭乃埋之

觀政進士張公羅俊

羅彥之兄守東城樓城陷從衆中擊賊手刃脫兩手抱賊齧賊耳血

淋漓口吻間大呼我進上張羅俊也聲不絕

諸生張君羅善

有勸之走者不可訣兩兄曰我家有忠臣豈可無義士遂投井死

武進士張公羅輔

初謀保伯兄潰圍出羅俊不從城陷羅輔射賊殺數人矢盡馳馬橫刀砍

賊賊圍之裂屍死○張氏兄弟五人惟羅詰出幸以免

羅彥之子晉

羅俊之子諸生伸

羅俊伯母李氏

年七十四罵賊死

羅善妻高氏

攜三女從夫井死

羅輔妻白氏

攜幼子二女井死

羅彥子婦師氏

從羅彥命井死

妾宋氏

錢氏

當羅彥令其妻趙氏與二妾同入井趙氏獨不沉家人出之再入復如故

有抱晉之子華宗至者曰夫人死將令張無後乃匿空舍中相扶潛出水門入山免

張羅士

妻高氏 張羅喆妻王氏 張震妻徐氏 張巽妻

劉氏

自光祿公以下張氏闔門死者二十有三人

監察御史金公毓峒 毓峒守西城城陷一綠衣賊追毓峒入三皇廟毓峒奮拳擊賊仆地

自負監軍御史印 毓峒姪武舉金君振孫 振孫妻王

氏 振孫佐毓峒守西城善射引弓命中賊多斃者城陷同輩或解甲匿振孫大呼曰我御史金毓峒之姪也

賊支解之其妻聞之縊

保定府同知攝府事邵公宗元 宗元與羅彥先定城守事而後太守何公至何

以印推讓宗元宗元守最力城陷徒步下城攜印走罵賊被殺死後手持印不解賊斷兩指挾印去

保定府太守何公復 太守初授任城已危自知必死而

公城將陷西北樓火發公奮氣親昇西洋砲因墮遂焚死

後衛指揮劉公忠嗣 忠嗣妻毛氏子婦王氏忠嗣妹

楊于戶妻劉氏忠嗣女劉氏 忠嗣與宗元羅彥實主城守事先城未破於二十三

日手以弓弦逼諸婦女自盡身仍登陴抗賊城破被執賊索印忠嗣怒叱咤奪賊刃殺兩人力盡受縛剜目劓

鼻死

左衛巡捕指揮文公運昌 妻宋氏 運昌與忠嗣同守城城陷夫婦攜手

投井死

邠州知州韓公東明 子仲淹 東明具衣冠望闕拜畢辭祖先投井死子仲淹

射賊墜城死

平涼府通判張公維綱罵賊不屈被殺

舉人高君涇死於水孫君從範被殺張君爾翬同妻唐氏死

貢生郭鳴世手擊賊死諸生賀誠衣巾同死何一中同妻趙

氏死王之珽同妻齊氏暨三子二女俱死韓楓同

妻王氏死

丙臣方公正化故保定總監城將危奉命復至守甚力賊將上以頭觸城大哭為亂兵所殺已

見內臣附祀中

右諸人皆與城俱亾者尚有城破後為劉芳亮所執

不屈被殺者四人

工部都給事中尹公洸 舉人劉君會昌 貢生王聯

芳 諸生王世琦

初自成聞保定堅守議出師聞既陷猶欲屠之有勸以京師既亡猶固守此忠義也何可盡殺乃止不屠芳亮仍執首事者尹公等至皆大罵不屈被殺芳亮懸賞購羅彥毓峒子弟之存者郡人莫應得毓峒姪肖孫問毓峒子所在備極炮烙終不言賊釋之竟以免

上之命李建泰督師也以御史金毓峒監其軍毓峒

保定人也保定總兵馬岱聞之介而見光祿少卿張

羅彥於家曰賊今兩路來任禎自固關劉芳亮自河

間吾當出鎮蠡縣以待敵請先殺妻子而決死戰其
城守一在公等羅彥曰諾旦日岱果焚其妻孥十一
口率師去羅彥乃同兄觀政進士羅俊弟武進士羅
輔與攝府事同知邵宗元計事邑紳尹洗韓東明張
維綱等武臣指揮劉忠嗣文運昌等舉人劉會昌孫
從範張爾翬高涇等貢生郭鳴世王聯芳等諸生賀
誠張羅善王世琦何一中王之珽韓楓等皆會糾鄉
兵得二千人甫刑牲盟北城上而真定反書聞副將
謝嘉福殺都御史徐標遣人出固關迎賊我城中裂

僞牌分汛設守部署粗有定會總監方正化太守何
復先後至正化舊守保定有功素善羅彥因以識邵
公於號令無所更而何公之爲守也誓必死而後入
以城守事先定固以印讓邵公曰吾當同死耳不可
臨敵易主者搖視聽也大會諸生講見危授命章聞
者爲之益奮督師李建泰者軍道散所齎帑銀以數
萬衛者止親軍五百退師抵城下守者不納賊將劉
芳亮漸逼建泰命其中軍郭中杰李勇因毓峒以求
入羅彥宗元不得已而後許旣入明旦芳亮至呼城

下何不降張羅俊顧其下厲聲曰苟欲降者取我首
去劉忠嗣撫劍曰有不從張氏兄弟守者劍砍之怒
目髮上指衆聲諾如雷賊驚顧退五里而舍是月二
十日也明日賊大至環攻中人有繼至正化所者傳
曰京師陷羅彥宗元哭曰曩止城守今則復君父仇
矣各飲泣北向拜又羅拜重訂盟毓峒大出銀牌懸
之堞羅彥再以私財佐賞賊穿城濠涸其流伐木治
攻具二十二日大攻西北陬守者奮殺賊無算賊射
書入城說以國亾誰與守建泰得之以示正化復曰

宜爲一城生靈計得一用印文書足以免正化泣不
應復曰太守未嘗受印也卽有印太守必不爲乃召
宗元宗元至而顧視其肘曰曩者何公讓印而某不
辭爲城守先在我耳今事急且與印同死卽何公爭
亦不與肯以送閣下印降書耶某江南一老貢生也
下吏薄祿不肯北面事賊公大臣受重任不圖報萬
一乃爲人趣降獨不念皇帝親祖正陽門君臣相別
時乎建泰語塞其從兵叩刃欲殺宗元奪印宗元擲
印於地拔佩刀自向左右力救之俄而羅彥毓峒馳

至取印強以納宗元懷中曰亟上城禦賊是日也賊
遶城大詬張吏部礮之飛入城者蔽天着人多死守
者猶不懈至廿四日巳刻賊火箭中城西北樓何太
守焚死正化爲亂兵所殺火光中見白甲黑纓者殺
人云督師親軍反城遂陷賊入羅彥毓峒皆殉節尹
洗等被執不屈見殺惟建泰降劉芳亮居二日率降
者去畱僞將張洪鎮守張洪之收諸下邑也保定總
兵馬岱居蠡縣自刎弗殊洪傳而致之以將斃故得
脫尋爲僧不知所終

保定陳僖者奇士也所葺甲申上谷紀事甚詳余採
而錄之具如前其餘殉城者世職指揮則有劉洪恩
戴世爵劉元靖呂九章李照李一廣千戶則有楊仁
政李尙忠紀勳趙世貴劉本源侯繼先張守道百戶
則有劉朝卿劉悅田守政王好善強忠武王爾祉若
而人職官散官則有守備張大同同之子垣戰死副
總兵呂應蛟縊死武進士陳國政井死忠順營中軍
梁儒秀把總申錫郝國忠中衛鎮撫管民治主薄沙
潤明材官王尊義醫官呂國賓王鑛王之瑄殺死若

而人文學則有杜日芳王絃馮澤王允嘉吳栻韓廷
珍楊善譽何光岳韓紹淹頡學會王敬嗣王繼桂趙
居晉王昌祚孫誠趙世珩楊拱辰王建極阮積學王
世珩王致中周之翰若而人義民得知姓名死狀者
則有劉宗向不屈迎刃死田仰名與田自重約互殺
其妻城破仰名殺自重妻羅氏自重殺仰名妻曹氏
二人同縊死楊強子刃賊勢屈刎死張加善不屈縊
死鄭國寧擊賊不中李懋倫罵賊王捷張智劉養心
朱永寧胡來獻胡得銀拒賊俱殺死儒士劉士璉不

屈王景曜罵賊射死黃棟火箭燒死列女殉節者陳
僖自爲陳氏節傳曰僖王母張宜人母楊氏妻常氏
妹文學金罌妻陳氏於廿三日同辭家廟集後園誓
井待城陷張捧誥命楊一手挽媳常一手挽女并侍
婢四人抱弟仔甫週歲隨之俱井死闔門殉者九人
又爲高氏節傳諸生高植妻王氏舉人高桂妻劉氏
城將破叩請公姑誓死賊入同縊其餘縊死者則有
錦衣衛千戶賀誥妻霍氏等十一人井死者則有進
士王延禔妻張氏等五十二人其死箭死水死刃者

不可勝數城內屍枕藉溝壑填滿僞官舉之三日不能盡蓋闔郡殉之云

南中政事無可書當以褒忠之典爲正雖然猶有失者一曰國論一曰野史阮大鍼張孫振以小人竊柄幸君父之禍快其已私假借東南一二不死者搆大獄將以剗刃其餘范文貞倪文正李忠文其所不得已而追崇之者也附祀以下則惟所倒置矣武臣之濫祀則誠意忻城爲之也內臣之濫祀則在南諸璫爲之也此國論之僨錯也山東河南大亂奏報斷絕

一二流傳半出於間關者之口吳人好以恩怨爲增飾優俳小夫又以猥談瑣語竄入其中莫甚於甲申紀事一書苟不亟爲駁正則遠方存疑後生惶惑信史之大害也若夫有冗官而死者有處士而死者保無死焉而不必其覈者乎又豈無死焉闕而不書者乎此野史之紕繆也余之論次北都益以寧武宣雲者當時之所定也宣雲之應附祀者何以書曰君子從其同焉保定則去京師之亾也五日矣越之敗也棲會稽齊之敗也莒卽墨不下彼燕代靡然而從者

聞保定之風亦可以少媿也哉

豫

文臣自督府以下死事者四十一人

三邊總督傅宗龍死於項城

十四年五月死於闖

陝西巡撫汪喬年死於襄城

十四年十一月死於闖

保定總督楊文岳死於汝寧城南三里店

十五年閏十一月死於闖

河南巡撫王漢被逆超殺於永城

漢初授河內縣時河北十九州縣盜大起

惟漢大得民心殺土寇始盡覃懷之間以安

分守河南道副使王允長雒陽城陷被傷賊退數日死

分巡大梁道叅議李乘雲力守禹州登城血戰連誅數

賊力窮被執罵賊不絕身受支解口呼皇天舌折殞命

乘雲高陽人乙科

睢陳兵備道僉事關永傑守陳州力竭猶手斬三四賊

被賊面一刀背一鎗擗于城下尙舉手指賊罵不絕口

被賊殊其首而死

永傑字人孟隴西人辛未進士長身赤面極類民間畫關壯繆像自言實

壯繆後其殉國有祖之風烈十五年三月死於闖

分守汝南道僉事艾毓初被賊殺於南陽城門內

字孩如米

脂人辛未進士

分守汝南道僉事王世琮被賊執罵不屈與保督同時

遇害

世琮達州舉人

保定監軍道任棟力解汴圍因左兵潰陣而死

棟永壽人貢生

秦督監軍同知孫兆祿死於襄城

開封府同知蘇茂灼管糧通判彭士奇倉大使徐陞稅

大使閻生白皆死

士奇高要人舉人

通許知縣費令謀城破投井死

今謀鉛山人舉人新任甫四十日力不支召父

老曰我死則爾輩可全端笏北向拜躍井中次日賊得之面如生

太康知縣魏令望舉家自焚死

令望武鄉人庚辰進士

尉氏知縣楊鵬城破罵賊死

鵬河津人舉人

洧川知縣柴存禋被賊殺

江山人貢生

鄢陵知縣劉振之罵賊被磔

慈谿人舉人

陳州知州侯君耀賊繩縛其首而膝不屈罵不絕口引

頸受戮

君耀成安人辛酉舉人

西華知縣劉伯謙抱印投井

商水知縣王化行被賊殺

商水再陷知縣姚文衡以新任投水死

許州知州王應翼襄城知縣曹思正皆被賊殺

應翼京山人舉人

思正岷州舉人

歸德府同知顏則孔推官王世琇皆死於賊營則孔沂州人貢

生世琇清苑人丁丑進士

鹿邑知縣紀懋勳城破自殺膠州舉人

河南府知府亢孟檜罵賊死臨汾舉人

偃師知縣徐日泰為賊所執被磔金谿人貢生

宜陽知縣唐起泰永寧知縣武大烈皆被賊殺

靈寶知縣朱挺死於賊營

南陽知府顏日愉未被破城先被賊殺死城上

新城知縣邱茂為袁賊破城殺死

泌陽知縣姚昌祚被賊殺

汝寧知府傅汝為投西城濠死通判朱如寶與楊保督

王巡道同遇害汝為江陵人甲戌進士如寶成都舉人

汝陽知縣文師頤被賊殺廣西舉人視事甫三日賊已至誓死守竟以殉

遂平知縣劉英死於城北劉家橋英貴州貢生十三年為遂平令自成犯豫

所向無堅城英鼓勵士卒嬰城死守

河南巡按蘇京奏曰臣前於補救六款題明殉難官

紳奉旨准行優卹着臣開列來看臣廣咨博採約畧

二百四十九人臣捐俸三百兩并各官所捐令祥符知縣董之侯建祠致祭謹列姓名備覽京疏如此以今所傳尚少二百八人蓋先列文臣自將吏紳矜以下邸抄弗錄也今就見聞以補其闕

文武大臣殉難者

南京兵部尚書贈太子太保再贈太傅呂忠節公維祺十四年正月公守洛陽北門縋家將下鬪殺十數人城陷北向慟哭暝日罵賊曰吾天子大臣死不媿天地不媿聖賢夫復何恨乃伸脰受刃容色自若

鎮守南陽總兵猛公如虎

十四年十一月公先以計殺賊精兵數千已而他門陷持

短刀巷戰手及袍袖有血數斗過唐府國門北向叩頭謝恩自稱力竭為賊所殺

援勦保定標營都督姜公名武

崑崙人崇禎十五年與賊大戰於朱仙鎮七日

力竭死贈特進榮祿大夫左都督

州守縣令以下死事者

郟縣知縣李公貞佐

貞佐安邑舉人率士民堅守城破賊縱兵大殺貞佐厲聲曰驅百姓

死守者知縣耳妄殺何為李自成褫其衣冠倒懸於樹貞佐大呼曰高皇帝有靈我必祈上帝以殺賊賊斷其舌剛之母喬氏及妻俱死

陝州知州史記言

八年十月混十萬老狗等從靈寶至陝州大雪登城記言被執罵賊死

宏農衛指揮掌君錫手殺兩賊而斃訓導王誠心邑

紳教諭姚君弼指揮楊道泰阮我疆鎮標陳三元俱

遇害

鄧州知州孫澤盛

按縣舉人十年二月土賊張三崇合張獻忠陷鄧澤盛與同知薛應齡出

戰死

鄧州知州劉振世

賊再陷鄧州振世與吏日李國璽死之

鄧州死難者八人

余承蔭

千戶李錫 千戶丁一統

諸生殺三賊而死

張五美

諸生被賊剔目鑿齒而死

王鍾王之章

俱諸生死海

寬 戰死 傅彥 被賊支解死

鎮平知縣鍾其碩

陝西成縣人

內鄉知縣龔新

江西舉人

舞

陽知縣潘宏

山陽貢生

魯山知縣楊呈芳

山海衛貢生

寶豐知

縣張人龍

遵化貢生

葉縣知縣張我翼

涇陽舉人

城陷皆為

李自成所殺

舞陽陳氏一門死難

陳預抱陳預養陳預懷

兄弟皆諸

生事孀母以孝十三年聞城陷母段氏投井率其妻子從之

泌陽知縣王士昌城陷為張獻忠所殺

雲南舉人

新安知縣陳某

守關門寨自成攻之三月始拔怒盡屠其民陳公大呼曰守寨者知縣耳百姓

何罪賊磔之百姓幸免者三十二人皆圖其像祀之

上蔡知縣許永禧

曲沃舉人十五年李自成攻上蔡先脅降不從城陷具袍笏北面再拜據

案秉燭端坐賊近乃自刎

西平知縣高斗垣繁峙人貢生十五年寇陷西平被執不屈死

真陽知縣王信真寧人貢生十一年單騎出撫土寇會流寇數萬掩至被執欲挾以誘真陽羅

山信不可遇害賊搶其首去邑諸生田育率鄉勇追去獲其元如生贈光祿寺少卿予特祠

商城知縣張國光大興舉人十六年知商城縣撫集荒殘不遺餘力聞北都陷從容具衣寇

日主辱臣死予雖小臣請從先皇帝於地下遂自經死

信陽知州高孝誌江都舉人十四年知信陽城陷不屈死

固始朱皋鎮巡檢郝瑞日秦人十五年以巡簡署羅山縣事踰月李自成偽官張某

至土寇萬朝勳與之合執瑞日脇降不從朝勳夜置酒羣賊皆醉瑞日夜半持七首殺朝勳斷胸截吭因懷印

走將以投鳳督遇雨不能進復為賊所執賊愛其勇欲畱之瑞日曰我殺賊為國自分死耳肯降汝乎遂為所

齧并從行二童子俱死

汝寧游擊朱榮祖汝陽人初以軍校為豫撫元默所知戰磁州通州有功殺土寇殷守祖等

皆其力城陷與妻孫氏登樓自焚死

汝寧千戶袁永基性剛直有才能讀書尤精天文占驗守南城賊登陴猶手刃數賊歸與母

王宜人訣東甲出短兵巷戰次子世允并家丁三人皆與難王宜人投井死

保督麾下副將馮某楊文岳之大將虎大威先汝寧未破攻土寨中礮身死自成攻汝寧

惟馮副將隨文岳在南湖力戰勢屈自刎

西關叅將王某北關副將趙某自成攻汝寧兩將力戰勢不敵自焚營柵砍馬

自刎 以上三人史皆失其名

又有汝寧千戶劉懋助楊紹祖戰死百戶葉榮蔭守南門死

張承德守西門死李衍壽 關忠國守柵死 尙有汝寧千

總王基蕭承運於八年與賊戰死東關千總張惟敬

數勝賊被斫下馬取其元以去

汝寧士民則有監生趙得庚 楊道臨 黃鼎雲

貢士林景賜 生員趙重明 費明棟 楊應禎

楊應祥 吳秀 李璣 楊鏢 張經訓 馬獻書

李士諤皆死 郭正誼負求脫母被刃 趙得唐 胡端

馬駿罵賊被殺

邑紳及孝廉之死事者

都察院左副都御史楊公所修字修白商城人萬歷庚戌進士崇禎十四年寇

攻商城公守西門城陷死之○以附璫名在逆案

通政司通政李公夢辰字元居睢州人戊辰進士

巡撫宣大右副都御史張公繼世寧陵人進士

翰林院檢討馬公剛中字抑伯商城人甲戌進士由大同推官考選以乞假歸十五年

獻賊攻城率義勇登陴力戰有勸之去者剛中曰我誓與此城存亡誰為此言可斬也城陷遇害

戶部主事崔公泌之字卜定鹿邑人乙丑進士

陽和道副使洪公允衡

商城人萬歷丙辰進士守商城北門力戰遇害

臨汾知縣張質

商水人

懷仁知縣楊士英

西平人恩貢罵賊并其子婦王氏亦死

附見

許州殉難者有都司張守正等十人鄉紳魏完真等

九人生員李文鵬等百四十五人武生王應鵬等十

六人省祭官王有威義民馬玉書等五百餘人節婦

王氏等二十八人

長葛典史杜復春等二人鄉紳舉人孟良屏等十一

人生員張範孔等五十九人烈婦戴文妻王氏等十

五人

臨潁千總賈蔭序襄城典史趙鳳豸俱嬰城固守力

竭死

項城教諭王君多福

息縣人拒偽職不受為書誠子自經死

陳州舉人王受爵

手刃數賊而死

汜水舉人張治載

馬德茂

巷戰死

歸德舉人徐作霖

吳伯裔

吳伯允

皆負才名為賊所殺

汝寧舉人王調鼎

十一年為賊洪用所殺

同時諸生李梅先

趙純

趙朴

李甲被執罵賊

義民馮

元之兄弟率鄉勇力戰俱死

內鄉諸生許宣

許案

許宮

倡義入鄧州執偽官堅守許家寨賊攻破之案

與生母常氏相從入井宣與宮皆死宣妻鍾氏案妻陳氏自經妹許氏罵賊被殺事聞贈宣案宮皆知縣人稱

許氏七烈

附見

劉時寵

上蔡人事親孝父宗禮以城陷年老不能去自殺而命時寵以逃時寵仰天大慟刺殺其

一子三女而夫婦俱自殺其已嫁之妹亦俱死

朱耀

固始人與其父允義兄炳思成皆勇敢崇禎八年寇圍城耀父子力戰獨突賊乃退九年耀身

自斬賊數十陷重圍為賊所擒大罵不屈而死父與兩兄奮勇復仇賊大敗固始乃全

又副將劉國能守葉縣李萬慶守襄城城破不肯從

賊死甚烈

萬慶贈都督同知榮祿大夫立祠襄城國能萬慶者降將國能即飛虎萬慶即射塌

天也又降將掃地王張一川擊獻賊被擒賊尚之

汴之亾也以水故不載雒陽福邸在焉賊得其資以

號召中原此興亾之所繫固當以雒陽為首呂尙書

以官以節法應特書故先之也猛將軍則其子先捷

前死於開縣矣視曹少保周忠壯何多讓焉或曰邑

紳武臣則既補之矣李貞佐鍾其碩等邑令也臺使

者何以弗錄則未知其遺之與抑予或過於所聞也
君子之聞人善也寧存而或疑無棄而勿信有忠厚
之道焉故筆之

秦

真寧襄樂二戰死忠者二人同死者一人

大同總兵都督同知贈太子少保曹公文詔八年七月公以三千

人與賊戰於真寧之湫頭斬級五百乘勝窮追三十里
為賊騎數萬所圍力屈轉鬪拔刀自刎死遊擊材官沒
者二十餘人事聞贈太子少保蔭一子指揮僉事世襲

副將艾公萬年與賊戰於寧州之襄樂鎮中伏被圍死之

副將柳公國楨

與萬年同沒

大臣兵敗赴陣死事者一人

兵部尚書三邊總督兼制應鳳江皖豫楚川黔軍務孫

公傳庭

十六年十月邠縣之敗公固守潼關關陷公退屯渭南賊攻渭南破之公策馬陷陣死公妻張

夫人於西安破日率二女六妾沉於井揮其八歲兒以去踰垣避賊墜民舍中有老翁善衣食之公長子世瑞重跣入秦得夫人屍貌如生老翁歸以弟相扶還見者泣下

同死者一人

叅軍喬君遷高

定襄人

西安城陷職官死事者六人

巡撫陝西都察院副都御史馮公師孔

按察使黃公綱綱字季侯汝寧光州人天啟壬戌進士初以蘭州兵備曾破李自成於山中由

洮岷道陞按察使西安陷賊誘以重爵正色不屈赴井死妻王淑人先自盡事聞贈太常卿諡忠烈其子黃燧

先以乙亥光州陷巷戰死

知府簡公仁瑞

長安知縣吳從義順天人庚辰進士

指揮崔爾達

秦府長史章世炯

西安鄉紳孝廉死事者

禮部尚書渭南南公企仲萬曆庚辰進士年八十三遇害

工部尚書南公居益企仲兄師仲之子被炮烙死

禮部祠祭司主事南公居業企仲子甲辰進士被炮烙死

右副都御史三原焦公原溥罵賊斷舌而死

宣大巡撫焦公原清不受僞職死

御史王公道純

叅政田公時震不受僞職死

副使祝公萬齡冠帶至斯道中天書院拜孔子自縊死

僉事王公徵七日不食死

誥封都察院朱公常德

舉人席增光 朱誼泉 俱投井誼泉係宗室

又都司舍人邱從周 從周長不滿三尺醉罵自成曰若小人據王府日追鄉官餉滅不久自成亦不殺曰此酒鬼持去時天寒其下棄之於地以凍死或云姓戴脩攷

屬城道臣以下死者

商雒道王公世清 滕縣人甲戌進士商州陷死之

渭南知縣楊暄 山西萬全衛人庚辰進士暄初與蔡教官同守東門舉人王命誥先自成未至

十里迎之因開東門以應城破索印不與擒之至不屈大罵并蔡教官俱被殺蔡遼東人命誥尋以事被劉宗敏笞掠欲殺之自成不許後用為兵部尙書其父亦舉人先朝為忻州知州賊敗後為兵所殺命誥遁去

蒲城知縣朱一統 抱印投井死

中牟知縣朱新鏢 中牟初未破知大勢不支趣妻妾死城陷乃自縊死

鳳翔知府唐公時明 時明字爾極固始人萬歷戊午經城陷自成遣牛金星誘降又令尙實說之大罵不屈自縊死死之次日尙實發狂暴死人謂時明陰擊之云

平涼知府簡公仁錫

崇信知縣龐瑜 公安人係甲戌年死難者

榆林文武大吏死者七人 秦人作七忠烈傳

兵備副使都公任 祥符人癸丑進士城陷引佩刀自裁

總兵王公世國 罵賊不屈死之公提督將軍威之子也

總兵尤公世祿

不屈罵賊死之其歷官見前

總兵王公世臣

不屈罵賊死之乃世國之弟

總兵李公昌齡

西涼勲屬僑居其地不屈罵賊死之公故延綏總兵也

總兵劉公某

罵賊被磔史失其名本中協副將為憲副燹鼎子

總兵惠公顯

被執過神木仰酖而絕本左協副將從諸生起家

又副將尤翟文

常懷德

李登龍

張發

楊明

游擊孫貴

尤養崑

守備白慎衡

李宗叙皆以

廢將守榆林死之

守將則遊擊傅德

潘國臣

李國奇

晏維新

陳二典

劉芳馨

劉廷傑

文侯國

守備尤勉

惠漸

賀大雷

楊以偉

榆林衛指揮李文焜

李文燦等皆守城遇害

慶陽官紳死者四人

副使段公復興

推官草公居聖

寧州知州董公琬

邑紳麻公僖

字立軒萬歷丁未進士官至太常少卿

耀州鄉紳

太常寺卿宋公師襄

固原鄉紳

江西巡撫張公鳳翮

甘肅死難者

巡撫甘肅林公日瑞

同難有副將郭天吉鞏昌監牧同知兼監紀甘州軍

事藍臺

字輝少光
州人貢士

州紳羅俊傑 趙宦

中軍哈維新 姚世儒

附見

崇禎七年固原道陸夢龍

閏八月二十五日賊圍靜
寧州夢龍來援兵敗死之

八年咸陽知縣趙躋昌

八月城
破被殺

又扶風知縣王國訓

城破死之
失其年

夫賊始於秦終於秦今以死事觀之是何秦人之多

也當曹少保之與賊戰于晉中也尤世祿曾為大將

而不效今與兩王劉李同時不屈此皆世將之冑語

曰不墮家聲諸公有焉世傳孫督師以軍興法為秦

父老所怨又何以流離急難秦人匿其孤以免也斯

非施德於秦之驗乎焦公罵賊兄弟同死南公以下
一時赴義者數人嗚呼豈可謂秦無人哉

晉

大臣死事者一人

巡撫山西提督雁門等關都察院右副都御史蔡忠襄

公懋德

十五年晉饑土寇王綱者恣甚公至定其遺孽
五臺交山諸寇俱盡李自成之破潼關也公以

八月至平陽防河十月廷議以公儒者非戡亂才詔以
郭景昌代之賊急有勸以解任自便者公曰吾平日講
學頗識死生大義今安危呼吸之秋忍去之乎縱新撫
至亦與同殉封疆耳其再從太原出師救平陽也諸將
難之公曰吾固知力不敵但不救平陽逆賊長驅無險
可守吾總辦一死與其死于城頭不如死於戰已而晉

王及士民擁馬不能前皆
泣以守省城為請乃止

同死者四十餘人

布政趙公建極罵賊不屈死

建極字生同河南永寧人
已未進士其家守王范寨

寨破為自成所屠建極五子皆死太原亾家仇國
怨一時并集故建極罵賊尤烈趙氏一門盡矣

按察司副使兼叅議督糧道蘭公剛中

字坦生山東陵
縣人辛未進士

以常博授南垣十六年陞今官十月至太原撫臣蔡公
方駐師蒲阪公分城東同諸司道設守甚力以陽和標
兵三千之調防省城者驕蹇慮為賊應強之移南關外
城中以安十七年河東望風欵潰獨汾州道范士髦斬
叛待援而公與蔡公三斬賊吏為守具賊於二月六日
攻太原明日南關外城陷果陽和叛兵應之也公在城
上殺賊數十會夜陰暄大風沙擊面公督守益力遲明
張雄引賊入公縊而未絕被執大罵次日遂被害元墮

復躍起丈餘賊眾驚愕辟易

冀寧道僉事畢公拱辰 萊陽人丙辰進士

副使毛公文炳 鄭州人戊辰進士

裨將牛勇 朱孔訓 王永魁先期陷陣死 孔訓初與勇同出戰

被傷城破死

中軍應時盛先殺妻子而後與蔡公同縊

當張雄之投賊也拔刀向時盛而先伏人焚城樓火藥時盛叱而追斬之不及藥焚風狂火烈時盛見大勢已去乃至南城擁公上馬自西城下遇賊巷戰擐

甲持矛左右衝突迴顧不見公遂單騎潰圍出俄而

遇公於道中公已棄馬仗劍立時盛曰何棄馬為公

曰諸將欲擁我奪門我應死去將何之 諸將以公下馬不肯行乃

擁巡道楊本楨奪西門出黎志陞時盛曰吾義不負

國以負公乃扶公至三立祠解其袍帶以為公縊於

東梁之左憂其身輕取已鐵鎧被之乃絕時盛向公

再拜而自縊於東梁之右是日也時盛手擊死數十

人賊辟易無敢當者又先期令妻子自殺而後與公

同殉誠所謂烈丈夫哉凡忠襄之忠應將軍成之也

賊之將渡河也以三道進下流則繇蒲阪趨平陽中
道則繇延綏趨汾晉上流則繇樓煩趨寧武賊初破
潼關則平陽為急比榆林延綏繼陷則岢嵐烽火相
接勢不得不返顧根本豈得以公去平陽為公咎歟
晉中止一大將有兵萬人而撫標不過三千防河議
起公疏以賊聚而攻我散而守為非策宜命周遇吉
掃寧武之眾率宣雲諸將以共拒之於河會其事中
格而遇吉頗以畫地分汛力扞北境為解其後所遣
二千人救平陽者退歸駐太原之外城南關或曰南關兵乃

陽和王繼謨所遣之賊至不戰開門迎降晉人頗尤
標兵非寧武卒也

之然公嘗有書約遇吉同死曰賊萬一渡河我死守
太原以遮其東公死守寧武以扼其北彼欲長驅直
犯畏兩鎮之議其後援師漸集則京師可以萬全此
睢陽之烈也遇吉大以為然既而兩人不負所諾嗚
呼大勢已去人心瓦解不能戰則有守不能守則有
死兩公無愧於心足矣他復何疑哉

附見

原任都司張宏業 百戶彭鯤 晉府典仗樊子英

諸生朱霞

霞宗室也父慎鉦賊憐其老欲釋之大呼曰奈何不殺我延頸就刃

樊

維藩

魏選奇

千戶司鼎

指揮劉秉鉞

馬負

圖

韓似雍

原任守備申鼎欽俱死

晉府儀衛司瞿通羣牧所千戶王德新俱死

江明北城鄉約守城賊至獨不去被殺

賊陷靈邱靈邱府掌理朱慎鏤宗子朱文衡朱長安

死之張景維陽曲人甲子舉人授光山知縣未任被

殺

晉府宗貢朱敏奈授龍門通判聞太原陷封府庫圖

籍為父位望闕遙拜自經死

任萬民陽曲人諸生以薦授武城令任三年城陷死

之孫禩陽曲貢任蒲州學正投井死

河曲諸生楊應璧

河曲人苗根干

苗純粹

趙

調元皆以擊賊被害

孫國顯丙子拔貢聞京師陷不食七日死妾鮑氏從

死

又崇禎八年死寇難者遼州知州李呈章

信陽人丙午孝廉遼

州陷坐堂上罵賊不屈死

又戶部郎中葛公凝秀

平定州人甲戌進士甲申八月賊脇授偽官不屈死

江北

鳳陵之難

太守顏容暄

囚服避獄中被執杖而後殺之

畱守司朱國相

千戶陳宏祖

陳其忠

俱禦賊戰

沒於陣

尙有指揮程永齡等九人

千戶盛可學等八人百

戶上官榮等二十人

鎮撫二人

內官崔成等十

人俱被殺

潁州之難

潁州知州尹夢鼇

手刃賊

通判趙士寬

巷戰與夢鼇皆被創投水闔門死

附指揮同知李從師

王廷俊

千戶孫升

田三

俊 百戶羅元慶

田得民

王之麒

州紳兵部尙書張公鶴鳴

年八十五賊倒懸於子張大樹射之大罵不屈死

同

伏父屍哭被殺

副使張公鶴騰

罵賊死鶴鳴之弟

又鄉紳劉道遠

田之頴

李生白

丁嘉遇

舉

人白精忠 郭三傑 生員死者七十七人
穎州衛生員死者二十六人

和州之難

知州事黎宏業 署學正舉人康正諫 訓導趙光遠

州紳監察御史馬公如蛟 候選運判馬如虬 諸

生馬如虹事聞九年正月宏業如蛟皆贈太僕少卿正

諫贈國子監監丞光遠贈學錄

又有張元貞贈鴻臚署丞張時行卜謨卜志皆贈王

簿不知先何官備考

舒城之難

翰林院編修贈某官胡公守恒 戊辰進士

蕭縣之陷 九年正月

鄉紳任之彥等十六人諸生孫思謙等五十二人被殺

巢縣之陷

知縣嚴覺 湖州貢生

廬州之陷

知廬州府太守鄭公履祥 浮梁人丙辰進士

原任叅政盧謙 端服危坐以待賊兵刃紛加擲尸小池池水盡赤

潛山之陷

潛山知縣李允嘉沈邱人被賊執脅降不從同典史沈

所安仁和皆遇害

懷遠龍岡集之戰

游擊朱子鳳頤廟灣兵五百與賊數萬戰于懷遠之龍岡集死之

宿松鄧家店之戰

副將程龍以火藥自殺安慶叅將番可大守備贈昭遠將

軍陳于王前防浦口有功偏裨詹兆鵬觸石死王希韓一

營陸王猷被斃黃宏猷鋸齒斷足罵不絕莫自驊唐世龍

王定遠 周嘉 張全斌 俞之夔 顧應宗 蔣達

潘象謙 季靖俱死皆贈懷遠將軍

南京京營之敗

神機營都司徐元亨戰歿

潁州知州舒城為江北三忠獨張鶴鳴為大司馬時

構陷熊廷弼廷弼之死成于丁相紹軾紹軾于長安

道上白日見廷弼歸而腦裂死鶴鳴年踰八十卒遇

慘難詎可以得正而斃遂恕其生平哉鄧家店之戰

陳于王以下偏裨也其贈卹為厚撫臣張國維請之

也吳兵不足用國維撫之以恩故于王爲之死余吳人也得其詳因備載焉

楚

武昌之難

太子太保禮部尙書文淵閣大學士賀文忠公逢聖

同死叅將崔文榮楚府長史徐學顏武昌通判李毓英

全家自經

邑紳馮公雲路熊公斐

承天之變

守獻陵楚撫宋一鶴 總兵錢中選 畱守都司沈壽

崇 鍾祥知縣蕭漢俱自殺 漢爲令賢賊戒其下勿殺

日吾盡吾道不碍汝法自經死 道臣張鳳翥 太守劉夢謙俱死

永州之難

監察御史巡按湖南劉公熙祚 張獻忠追三王至永州熙祚率水師禦之遣兵

護三王入西粵返身入州死守城陷不屈閉目絕食題絕命詞于永陽驛之壁上罵賊遇害

推知死事最烈者四人

長沙府推官蔡公道憲 晉江人丁丑進士有健卒林國俊等九人從死焉

房縣知縣郝公景春 景春字和滿號際明江都人與其子鳴鑿同罵賊遇害○城初陷鳴

鑿哭求景春不得僕陳宜散髮跣足從亂軍中遇景春
見數十騎擁之去至汝才營汝才泣曰奈何景春曰何
傷誰為尋吾兒來一卒持旗去久之奔至見景春哭景
春曰男兒至此只要自己決斷耳以手自畫頸曰此亦
不甚痛也鳴鑿收淚慷慨曰兒所苦父子死不相見既
見敢不勉汝才亦感泣見者皆泣已而見獻忠不屈獻
忠指張大經曰彼九省監軍道如何恭敬汝一知縣敢
爾景春曰彼已降賊不值一錢吾豈效彼者乃殺一丞
以懼之丞者朱典史也景春罵如故獻忠與大經怒遂
見殺鳴鑿撫父屍大呼曰死賊何不殺我遂與陳宜同
遇害事聞贈景
春太僕少卿

穀城知縣阮之鈿

隨州知州徐世淳

斬黃之難

蘄州兵備道許公文岐

仁和人甲戌進士被執至望華山死

黃岡知縣孫自一

字澹一光山人庚辰進士

羅田知縣沈壽嶽

宣城人舉人

耿某耿某

黃安人某為倉場尚書定向之子某為都憲定力之子倡義與張獻忠戰被殺

黃州鄉紳副使樊公維城

罵賊不屈洞宵死於郡較門

黃岡諸生易道沛

易道暹及其子諸生易為璉

又應山孝廉劉申錫

甲子舉人倡義於應山孝感雲夢申錫恢復後為賊將白旺所殺申

錫家饒於貲養死士百人與申錫皆戰死

程良疇

倡義白雲寨恢復孝感斬賊首二十八騎後以戰敗為白旺所獲死於安陸縣○偽令田助公

守孝感良疇以白雲寨義兵逐之良疇方征各寨之降賊者助公遁至德安請兵與良疇戰良疇督兵過他寨寨破被擒白旺強之以降踰半年不屈會左良玉遣惠登相攻德安白旺以左兵乃良疇召之來也遂於城上殺之良疇復縣之功賴諸生萬以忠之功居多以忠舊臺臣萬言掄之子也以忠捐貲守城獻忠已登城而擊之下城賴以全後自成陷孝感復同良疇恢復奇士也竟得以病終

隨州初陷死難

知州王燾 太倉人戊午舉人

獻賊襄陽之難

兵備副使張公克儉 十四年二月克儉已陞河南巡撫未赴任難作

推官鄺公曰廣

襄陽知縣李公大覺

獻賊湖南之難

湘陰知縣楊公開 廣東潮州舉人

衡陽知縣張公鵬翼

東安知縣陳公道受 皆遇害 又馮一第 湖廣甲子舉人第二避賊

入山中會獻忠得其父乃出強以官大罵不屈死

獻賊破麻城

署麻城縣蕭頌聖死之

李自成荆襄之難

棗陽令郭裕

新淦舉人

宜城令陳美

新建舉人

光化令萬敬宗

南昌人皆以破城被殺

不受李自成偽署而死者

福州通判宋公大勛

羅平知州蔡公思繩

皆襄陽人以不從賊

而死

江陵舉人陳萬策

李開先

光化舉人韓應龍

強以官自殺

封禮部侍郎邱公民忠

城破自經死闖賊之難大學士瑜之父

賀文忠醇儒成仁取義得之於所學其入水不濡若

有物守之者天亦知其忠況於人乎承天之陷賊欲發獻陵大聲作於山谷乃懼而止彼宋一鶴錢中選一死不足塞責然以興獻皇之靈不可以莫之殉也亦足以贖其辜矣劉御史送三王入粵身返永州固守被執題詩驛壁而自縊抑何其從容歟此吾所為書其官書其地書其事其死各有不同也蔡道憲徐世淳郝景春阮之鈿徐學顏崔文榮此六人者殉義慷慨雖古之烈士何以復加固當光於前史矣抑吾又有疑焉楊嗣昌未始不為盡瘁獨其薦熊文燦以

倖解免而遂至誤國後世棄其力而思其罪則嗣昌戮餘也安得謂之死勤事乎賀文忠以篤謹而得正命楊武陵以懷詐而被惡名不然以彼生平詎出一鶴之下而不得列於死事吾見言者責之太過故於紀楚也表而出之欲以服其心也

蜀

十年流寇入蜀之難

昭化知縣王時化

贈尚寶丞

劔州知州徐尙卿

贈參議

郫縣主簿張應奇

贈按察司知事

金堂典史潘夢科

贈將仕郎

廣元破守將總兵侯良柱陣亡

十三年流寇入蜀之難

楚將汪之鳳與賊戰於土地嶺死之

蜀將張令與賊

戰於黃泥窪死之

參將劉士杰與獻忠大戰於開縣

士杰及游擊郭開猛先捷皆戰死

重慶之難

舊撫陳公士奇

鎮海人乙丑進士

知府王公行儉

宜興人丁丑進士

巴縣令王公錫

新建人庚辰進士

成都之難

巡撫四川龍公文光 馬平籍維容人壬戌進士

陝監察御史劉公之勃 字安劉陝西寶鷄人獻賊以之勃同鄉欲用之之勃給以不殺

百姓既見勸以改邪從正擁立蜀世子不從即大罵求死

成都推官劉公士斗 字映為南海人辛未進士當之勃與獻忠語而未決士斗從後大呼

曰此賊也公不可少自屈賊執之士斗又反顧之勃面語如前其死最烈

成都知縣吳公繼善 太倉人丁丑進士

華陽知縣沈公雲祚 太倉人庚辰進士之勃士斗被縛雲祚白請同死遂遇害

仁壽知縣顧公繩詒 吳縣舉人

資陽知縣賀公允選 字繼登丹陽人甲子舉人賊破資陽執之不屈處之別營至乙酉冬

被殺十七口俱死

總兵劉公佳允

邑紳太常寺卿尹公伸

戶科左給事中吳公宇英

偏沅巡撫西充李公乾德

當重慶之陷也邑紳有童思聖者請降賊令之招其

同年刁化神化神得書不至思聖仍被殺夫以賊之

強暴腹心左右嚴錫命且不免於死而他人尙苟免

求全徒取僇辱此尹太常之罵賊不屈爲得死所也
李西充初以沅撫破賊旣入蜀而聞其父遇害乃與
袁韜起事後率其弟升德同赴水死則獻忠之滅也
已歲然乾德始終與獻賊爲仇讐而汨羅之投又
以滇兵復出爲獻賊餘黨則其死事安可不書耶瑞
王之被難關南道陳羽白亦以從王遇禍以秦則非
其地以蜀則非其官故弗及也

附紀

死事之表章固矣其不死者責以大義可也世俗流

傳好用私意相增飾如甲申紀事者出于小說家之
口尤失實不經項水心煜者居家無循行爲公論所
薄在朝累以詭激市伉直聲賊本三月十九日破京
師水心于四月十八日已到陪都嗣君卽位身與拜
舞之列因向朝士述在塗毀形易服狀爲南陳御史
所糾其月日可攷據當時欲以污僞署殺之以彼棄
妾與帑萬死南還三千餘里之遠不一月重繭而至
不知更有何地何日可以從賊黃石齋先生正告南
中用事者曰唐天寶之亂從王爲上自拔次之若水

心者何罪余親聞其語深服以爲篤論周介生鍾者
才不足以副其名爲人乃友悌篤厚不死實大負生
平與衆同罪更復何辭乃元末紅巾堯舜湯武等語
見載輟耕錄遽以之入爰書行大法讒口嗷嗷此何
說乎迹其禍本劉澤清曾金幣聘之不應介生有季
弟鉞當同飲阮懷寧家壞坐大罵介生不爲謝以此
兩人切齒衆傳成其獄李舒章妄以詩弔之曰亂世
身名可自由恨君不及鄭台州劇秦新論何曾草月
旦家評總世仇汝南中從兄弟晚歲睚眦不合急難
乃緣飾訛傳外人遂指左驗舒章之詩蓋實錄也野
史錯亂甚多不可枚舉後世論其事者宜加詳攷焉

綏寇紀畧補遺中

終

